

নদী-হাওরে অপরিকল্পিত প্রকল্পই ভয়াবহ বন্যার কারণ
আবুল কালাম ১৯ জুন ২০২২, ০০:০০

উন্নয়নের নামে নদী ও হাওরে অপরিকল্পিত প্রকল্পই বন্যার ভয়াবহতার প্রধান কারণ

পরিবেশ বিজ্ঞানী মোহাম্মদ আবদুর রব নয়া দিগন্তকে বলেন, উন্নয়নের নামে নদী ও হাওরে যেসব প্রকল্প নেয়া হয়েছে সেগুলো এই বন্যার অন্যতম কারণ। তিনি বলেন, হাওরের এসব প্রকল্পের কোথায় বাঁধ পরিকল্পনা মতো হয়নি। এসব কারণে তা নদী ও হাওরের পানির স্বাভাবিক প্রবাহ বাধাগ্রস্ত করেছে। এ ছাড়া সুরমা নদীতে দুই পারের বাসিন্দাদের ময়লা ফেলা ও নগরীর ময়লা জমে নদীর তলদেশে চর জমেছে। ফলে নদী নাব্যতা হারিয়ে পানির প্রবাহ ও ধারণক্ষমতা হারিয়েছে। এতে করে ভয়াবহ রূপ ধারণ করেছে বন্যা।

বাংলাদেশ পরিবেশ আন্দোলন (বাপা) সিলেটের সাধারণ সম্পাদক আবদুল করিম চৌধুরী কিম বলেন, নানা কারণে অসংখ্য হাওর বিল ভরাট হয়েছে। আর নদী খনন না হওয়াতে উজান থেকে নেমে আসা ঢলের সাথে যে মাটি আসে তা নদীর গভীরতাকে নষ্ট করেছে। যার কারণে পানি নিষ্কাশন ও ধারণক্ষমতা কমে যাওয়ায় বন্যার ভয়াবহতা বাড়ছে।